

Samþykkt fyrir ungmennaráð Bláskógabyggðar

Um verkefni ungmennaráðs

1.gr.

Ungmennaráð er ráðgefandi um málefni er tengjast ungu fólki á aldrinum 14 til 25 ára í sveitarfélaginu, í umboði sveitarstjórnar, eftir því sem nánar kemur fram í samþykkt þessari.

2. gr.

Ungmennaráð gerir tillögur til sveitarstjórnar um hvert það mál sem ráðið telur tengjast hagsmunum og aðstæðum ungs fólks. Ráðið fylgist með því, eins og við á, að stofnanir sveitarfélagsins vinni með hagsmuni ungs fólks að leiðarljósi og að þjónusta sveitarfélagsins taki mið af þörfum þeirra. Með þessu móti er reynt að efla umfjöllun innan stjórnsýslu sveitarfélagsins um málefni er tengjast ungu fólki.

3. gr.

Helstu markmið og hlutverk ungmennaráðs eru:

- að koma skoðunum og tillögum ungs fólks í sveitarfélaginu til viðeigandi aðila í stjórnkerfi sveitarfélagsins.
- að gæta hagsmuna ungs fólks í sveitarfélaginu t.d. með umfjöllun og umsögnum um mál sem snerta aldurshópinn sérstaklega.
- að fulltrúar ráðsins þjálfist í lýðræðislegum vinnubrögðum og læri á stjórnkerfi sveitarfélagsins.
- að vera ráðgefandi um framtíðarsýn í frístundastarfsemi fyrir ungt fólk í sveitarfélaginu.
- að efla tengsl nemenda í Bláskógaskóla á Laugarvatni og í Reykholti við sveitarstjórn með því að standa fyrir umræðu innan skólanna um þau mál er geta verið til hagsbóta fyrir nemendur.
- að efla tengsl ungs fólks á aldrinum 17-25 ára og sveitarstjórnar um þau mál er geta verið til hagsbóta fyrir ungt fólk á þessu aldursstigi.
- gera tillögur til sveitarstjórnar um stefnumörkum um málefni ungs fólks.

4. gr.

Ungmennaráð tekur til umfjöllunar þau mál sem sveitarstjórn og nefndir sveitarfélagsins óska eftir hverju sinni og önnur þau mál sem ráðið telur nauðsynlegt að fjalla um í samræmi við hlutverk og markmið ráðsins.

5. gr.

Ungmennaráð starfar samkvæmt fjárveitingu sem samþykkt er af sveitarstjórn við gerð fjárhagsáætlunar ár hvert, sem það getur notað til fræðslu, útgáfu eða annars sem þörf þykir á. Ungmennaráð gerir starfsáætlun fyrir starfsárið.

6.gr.

Ungmennaráð starfar í samræmi við eftirfarandi samþykktir sveitarstjórnar Bláskógabyggðar:

- skólastefnu Bláskógabyggðar
- forvarnarstefnu Bláskógabyggðar
- aðrar samþykktir sveitarstjórnar sem tengjast starfsemi ráðsins
- samþykkt um stjórn Bláskógabyggðar

Um skipan fulltrúa og fundi

7.gr.

Ungmennaráð skal skipað fimm fulltrúum og fimm til vara á aldrinum 14 til 25 ára. Allir fulltrúar skulu hafa lögheimili í Bláskógabyggð.

Sveitarstjórn óskar eftir því að eftirfarandi nefndir, stofnanir og félagasamtök tilnefni árlega fulltrúa í ungmennaráðið og skal tilnefningin eiga sér stað fyrir 20. september ár hvert.

- Bláskógaskóli, Laugarvatni tilnefnir einn fulltrúa og einn til vara.
- Bláskógaskóli, Reykholti tilnefnir einn fulltrúa og einn til vara.
- Ungmennafélögin og björgunarsveitirnar skulu sameiginlega tilnefna tvo fulltrúa og tvo til vara sem komnir eru af grunnskólaaldri.
- Æskulýðsnefnd tilnefnir einn fulltrúa og einn til vara eldri en 20 ára.

Starfstími ungmennaráðs skal vera frá 1. október til 1. júní, ár hvert.

8.gr.

Á fyrsta fundi ráðsins kýs ráðið sér formann og varaformann. Formaður ráðsins stjórnar fundum og sér um að allt fari þar löglega og skipulega fram. Fundarmönnum er skylt að lúta valdi formanns að því er varðar fundarsköp og góða reglu.

9. gr.

Ungmennaráð heldur a.m.k. þrjá fundi á hverju starfsári. Auk þess fundar ungmennaráðið í mars, ár hvert, með sveitarstjórn Bláskógabyggðar. Dagskrá fundarins skal undirbúin í samráði við sveitarstjóra.

10. gr.

Sveitarstjórn skipar starfsmann ráðsins. Hann situr að jafnaði fundi ungmennaráðs með málfrelsi og tillögurétt. Heimilt er að boða aðra á fundi ráðsins til að ræða tiltekin mál. Einnig skal ungmennaráð taka vel í ef ósk kemur frá öðrum starfsmönnum sveitarfélagsins um að fá að sitja fundi þegar fjallað er um verkefni sem tengjast verksviði þeirra.

Um yfirstjórn ungmennaráðs

11. gr.

Formaður ungmennaráðs hverju sinni er í forsvari fyrir ungmennaráð um tillögur og áherslur þess eftir því sem við á. Sveitarstjóri ber ábyrgð á rekstri og stjórnslu ráðsins, framkvæmd ákvarðana þess, eftirfylgni við ályktanir og fjármálum.

Um fundarsköp ungmennaráðs

12. gr.

Um fundarsköp á fundum ungmennaráðs gilda ákvæði sveitarstjórnarlaga og samþykkt um stjórn Bláskógabyggðar og fundarsköp sveitarstjórnar. Ráðið fellur undir sömu reglur og nefndir hjá Bláskógabyggð.

13. gr.

Þóknun er greidd fyrir hvern fund samkvæmt samþykktum um fundarþóknun nefnda sveitarfélagsins.

14. gr.

Um ritun fundargerða ungmennaráðs gilda sömu reglur og um ritun fundargerða sveitarstjórnar og nefnda sveitarfélagsins.

15. gr.

Um hæfi fulltrúa ungmennaráðs gilda ákvæði 19. gr. sveitarstjórnarlaga nr. 45/1998, II. kafla stjórnsýslulaga nr. 37/1993 og samþykkt um stjórn og fundarsköp Bláskógabyggðar. Um hæfi starfsmanna ráðsins gilda ákvæði II. kafla stjórnsýslulaga nr. 37/1993.

Gildi samþykktarinnar

16. gr.

Samþykkt þessi tekur gildi með staðfestingu sveitarstjórnar þann 10. desember 2015.



Valtýr Valtýsson
sveitarstjóri Bláskógabyggðar

